



Sveobuhvatne mudrosti (Meka)

Hatib: dr. Salih ibn Abdullah el-Humejd

3. rebiul-evvel 1446. po Hidžri / 6. septembar 2024.

Hvala Allahu, Koji obilno daruje i Koji je darežljiv. Hvalim Ga, slavljen neka je On, i zahvaljujem Mu, On je hvaljen na svakom jeziku. Svjedočim da nema boga osim Allaha, Jedinog, Koji nema sudruga, svjedočanstvom istine, ubjeđenja i priznanja, očišćenim od sumnje i poricanja, i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i Njegov poslanik, vlasnik Mekami-mahmuda, hvale vrijednog položaja, i Havda, tekućeg vrela. Neka su Allahovi blagoslovi, mir i spas na njega, na njegovu porodicu i njegove ashabe, koji su pomogli vjeru i svjedočili istinu, i na one koji ih slijede u dobročinstvu do Sudnjeg dana.

O ljudi, oporučujem sebi i vama bogobojaznost. Bojte se Allaha, Allah vam se smilovao, i držite se Njegove zaštite, jer On oprašta grijeha i otklanja nevolje. Sjećajte Ga se mnogo, jer srca se smiruju sjećanjem na Njega. Nemojte da vas zavara ovaj svijet, jer njegovi užici ne traju. Čuvajte se nade u dug život, jer je smrtni čas blizu i neizbježan je. Zahvaljujte Mu na obnavljanju i trajanju blagodati. Zdravlje, kada traje, ne cijeni se, a kada se izgubi, onda se shvati njegova vrijednost. Gospodaru, utječemo Ti se od nestanka Tvojih blagodati, promjene nagore i iznenadne kazne. "... i neka vam je na umu blagodat koju vam Allah daje, i Knjiga, i mudrost koju vam objavljuje, kojom vas savjetuje. Allaha se bojte i da Allah sve zna – na umu imajte!" (El-Bekara, 231)

O muslimani, istina ima svjetlo, a vrlina ljepotu. Duboka mudrost i lijep savjet, kada se nađu u pouzdanim riječima i blagom govoru, privlače duše i umiruju umove. U njima, njihovoj blagosti i pristojnosti očit je dokaz i jasan argument, i ukazuju na to da za svaku priliku i za svaku osobu postoji prikladan govor. "Na put Gospodara





svoga mudro i lijepim savjetom pozivaj i s njima na najljepši način raspravljaj! Gospodar tvoj zna one koji su zalutali s puta Njegova, i On zna one koji su na Pravome putu." (En-Nahl, 125).

Braćo u islamu, ovo su sveobuhvatne riječi naših učenjaka i mudraca koje podsjećaju na ono što omekšava srca, pročišćava duše i vraća zalutale. To su upute za ispravan život na ovom i lijep povratak Allahu na onom svijetu, postizanje uspjeha na oba svijeta i dvostruke sreće. "Samo oni koji pameti imaju pouku primaju!" (Ez-Zumer, 9) "... i nastavi savjetovati, savjet će vjernicima, doista, koristiti." (Ez-Zarijat, 55)

O muslimani! U ovim uputama učenjaci kažu: Postojanost na istini postiže se slijeđenjem puta Upute, u halal ishrani, ozbiljnosti u postizanju bogobožnosti, stalnom sjećanju na Allaha, pridržavanju šerijata i poštovanju svetosti muslimana. Onaj čija je nutrina ispravna, ispravne su mu i ostale stvari.

Dobro je u pet osobina: "odjeći" bogobožnosti, pouzdanju u Allaha, stjecanju halal zarade, bogatstvu duše i suzdržavanju od zla. Najgora bolest je loš karakter i nepristojan govor.

Znajte, Allah vam se smilovao, da Allahovo odgađanje nije zanemarivanje; rob će biti pitan i nagrađen ili kažnjen. Samo oni koji se boje i strahuju opominju se: "... dozat će se onaj koji se Allaha boji." (El-A'la, 10) Dovoljno je čovjeku znanja da se boji Allaha, a dovoljno mu je neznanja da se divi svom djelu.

Čovjek koji sebi želi dobro treba da se čuva vanjske poniznosti i unutrašnje pokvarenosti. Neka se stidi toga da popravi ono što je vidljivo ljudima, a ne popravljajući ono što zna Stvoritelj, uzvišen neka je On: "Allah ne gleda u vaše likove niti u vaša djela, već gleda u vaša srca." Onaj ko popravi svoju unutrašnjost, Allah će mu popraviti vanjštinu, i "onaj ko sakrije sramotu svog brata, Allah će sakriti njegovu sramotu, a onaj ko prati sramotu svog brata, Allah će pratiti njegovu sramotu, pa će ga osramotiti čak i u njegovoj kući".

O muslimani! Istina vodi ka dobroti, a dobrota vodi ka Džennetu. Laž vodi ka grijehu, a grijeh vodi ka Vatri. Druženje sa zlim ljudima uzrokuje loše mišljenje o





dobrim ljudima, a zavist rađa nedostatak saosjećanja prema muslimanima. Loša opskrba za povratak Allahu jeste neprijateljstvo prema ljudima.

Nepravda prema samom sebi ogleda se u tome da čovjek nađe izgovor za sebe u svemu, a ne opravdava svoju braću ni u čemu. Samo jaki se izvinjavaju, samo hrabri opraštaju i samo sretni zaboravljaju.

Znajte, Allah vam se smilovao, da ljudi ne kude čovjeka osim onoliko koliko je Allah stavio u njihova srca. Onome ko se boji Allaha niko neće nauditi, a onome ko se boji nekog drugog osim Allaha niko neće koristiti. Koliko god rob voli svog Gospodara, toliko će Allah učiniti da ga ljudi vole. Što više rob strahuje od svog Gospodara, Allah će u srca ljudi uliti veće poštovanje prema njemu.

O Allahov robe, govori istinu, drži se istine, radi ispravno, i ljudi će biti zadovoljni, makar i nakon nekog vremena. Briga za ovaj svijet rađa tamu u srcu, a briga za onaj svijet donosi svjetlo u srcu. Ljutnja je kazna kojom čovjek kažnjava sebe, a nepravda je prema drugima. Ono što trebamo znati jeste da je uzrok neslaganja među ljudima ili krivo shvaćena namjera ili pogrešno razumijevanje.

Braćo u islamu, onaj ko koristi sredstva komunikacije, neka podsjeća na obavezu, neka ukazuje na sunnet, neka upozorava na grešku, neka savjetuje s lijepom namjerom, tražeći nagradu i sevap, neka se trudi da okupi ljude oko zajedničke riječi, neka ima lijepo mišljenje, neka voli svom bratu ono što voli sebi, i neka misli dobro o svom bratu, i neka se čuva zla svog lošeg mišljenja.

Onaj koji sebi želi dobro neka se čuva beskorisnog trošenja vremena na društvenim mrežama i ulaska u rasprave s onima koji ih nisu dostojni.

O, kako je samo sretan čovjeka kojem je Allah dao pokajanje, koje ga čuva od ustrajnosti u grijehu, strah koji ga štiti od odgađanja i nadu koja mu skraćuje očekivanja, i koji je svoje vrijeme ispunio zikrom – spominjanjem svog Gospodara, u čistoj vjeri i pravoj iskrenosti. Svaki "pojilac" bit će napojen onim čime je pojo drugu. Onome koji je opomenut, a ne opameti se, uskraćeno je dobro, a onaj koji se





bavi onim što ga se ne tiče, sām je kriv. I bojte se dana kada će rob reći svom Gospodaru: "Kamo sreće da sam se za ovaj život pripremio!" (El-Fedžr, 24)

Nastoj, Allah te čuvao, da budeš od onih koji, kada znaju, budu blagi, a kada se od njih traži, daju. Budi pomoćnik onome koji traži uputu, saveznik istine onome koji traži savjet i riznica dobrote onome koji traži pomoć. Budi blizu zadovoljstva, daleko od niskih ciljeva. Neka ti istina bude cilj, stid pokrivač, a bogobožnost odjeća. Svjetlom dokaza se upravljaj, a naučne istine prihvati. Ako posrneš, vrati se; ako pogriješiš, izvini se; ako zgriješiš, prestani; ako ne znaš, pitaj; ako se naljutiš, obuzdaj se. Znaj da imaš prednost sve dok ne vidiš svoju prednost, a kada je vidiš, onda je više nemaš.

Bojte se Allaha, Allah vam se smilovao, i znajte da imate čuvare, plemenite pisare, koji znaju šta radite.

Donosite salavat i selam na darovanu milost, nepresušnu blagodat, vašeg vjerovjesnika Muhammeda, Allahovog poslanika. To vam je naredio vaš Gospodar, rekavši: "Allah i meleki Njegovi blagosilju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

